

碧城仙館詩鈔

一



碧城仙館詩鈔

陳文述撰

中華書局

碧城仙館詩鈔

二

陳文述撰

中華書局

19933

叢書集成初編

碧城仙館詩鈔 二冊

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

碧城仙館詩鈔

此據靈鵜閣叢書
本排印初編各叢
書僅有此本

碧城僊館詩鈔目錄

卷一

古今體詩八十八首

卷二

古今體詩八十七首

卷三

古今體詩七十四首

卷四

古今體詩八十八首

卷五

古今體詩七十四首

卷六

古今體詩九十七首

卷七

碧城僊館詩鈔 目錄

古今體詩一百八首

卷八

古今體詩八十七首

碧城僊館詩鈔卷一

仿宋畫院製團扇

清 錢塘陳文述雲伯撰

江南三月春風歇。櫻桃花底鶯聲滑。合歡團扇製輕絢。分明採得天邊月。南渡丹青待詔多。傳聞舊譜出宣和。人懷休說班姬怨。羞見曾憐謝女歌。班姬謝女今何有。攜來合付纖纖手。闌前撲蝶影香遲。花開障面徘徊久。樓臺花鳥院中春。馬畫楊題竟逼真。歌得合歡詞一曲。不知誰是合歡人。

續江醴陵雜體詩三十首

謝吏部朓 省直

明星低鴛鴦。華月麗鵲鵲。仙露潤金掌。春烟羃紅藥。離宮遙鳳吹。周廬下魚鑰。連漏遞壺箭。蘭綺靜鈴索。嗟予淡泊人。奉官畏薄弱。爐香挹粉署。封事達黃閣。漸此鳴玉登。思得投簪作。初服踐素心。春山臥雲壑。

王寧朔融 遊邸

遨遊陶嘉晨。淡泊究玄理。曳裾金張門。列輦田寶里。朱門開行馬。珍木蔭新雉。藻繪麗金鋪。蘭桂馥瑤尻。圓沼儵魚上。柔條文禽起。會食羅鼎彝。列坐覽書史。得性謝天伐。悠哉味彌旨。

江記室淹 楚望

瀟湘澹無際。空水自徘徊。衡陽雁初過。巫山雲不來。斑竹美人怨。蘭芷騷人哀。蒼梧弔舜祠。章華登楚臺。荆門上明月。故宮生綠苔。簫鼓逝陳迹。羅綺紛塵埃。唐宋渺難作。望古空悠哉。

梁簡文帝綱 閨思

秋水蕩迴波。秋雲寒薄羅。空牀冷文簾。圓規銷畫娥。杏梁留燕少。珠箔飛螢多。搗衣愁逐杵。織錦淚隨梭。繁霜下玉樹。寒燼辭金荷。月生青海劍。葉落榆關戈。莫言妾夢短。夜夜在交河。

梁元帝繹 述懷

笳鼓荆門震。樓船鄂渚橫。瀟湘堪飲馬。巫峽正屯兵。雍狐衛辰蓋。燕犀出子城。桃花小隊馬。蘭葉中央旌。壯士長榆塞。將軍細柳營。銅駝晉南渡。朱鷺漢西京。擊楫祖逖志。麾扇顧榮情。各厲澄清志。終看日域平。

沈特進約 三日

令節正元巳。芳期值上旬。鶯花洛陽道。車馬長安春。珠袍柘枝彈。繡幃茱萸輪。采芳槐里市。修禊蘭池濱。投壺笑玉女。捧劍出金神。流波漾扈羽。歌吹動梁塵。細雪桐花落。圓錢萍葉新。脩楊連小苑。芳樹入平津。歡娛不辭晚。遨遊貴及辰。緬茲萬壽獻。重以百福臻。年芳悵遲暮。應復眷佳人。

范僕射雲 貽友

朝出耘東田。暮歸下南岡。村墟生夕煙。平楚餘頽陽。稚子牽衣言。有客來東方。綰組復影纓。珠玑生輝光。殷勤重致辭。良久遲中堂。審聽知是君。寸心感傍徨。縞紵訂僑札。雞黍信范張。石交一窮達。古義今益彰。

附書南飛雁。夢寐同翱翔。

邱中郎遲宴別

魚鑰開九門。鸞輿戒七萃。風清轉翠華。林長通羽騎。帷宮麗平野。鳴笳叶流吹。龍旗列玉仗。虎竹頒金瑞。名藩介弟資。重鎮淮南寄。國典隆展親。皇眎重明試。免茲報政期。陳規申古義。

柳吳興憚擣衣

月照蜘蛛屋。星低蟋蟀堂。殘香溫羅薦。華燭明蘭房。流雲韜絳河。清露凝紅芳。冰絃纏寶瑟。玉筯啼繁霜。霜飛冷翠幃。落落黃金徽。空房妾獨處。遠行君未歸。流黃五雜組。織素九張機。憐妾心有結。念君寒無衣。空庭夜岑寂。蟲聲出東壁。默默腸九迴。斑斑淚雙滴。尙記身短長。不知體肥瘠。擣衣復擣衣。擣衣心惻惻。惻惻復悽悽。樓頭烏夜啼。急節斷還續。繁聲高復低。織錦秦川女。停針竇氏妻。纔聞說薊北。忽又夢遼西。西北路迢遞。極目關山寒。尙恐貂裘薄。敢念鴛衾單。書託早鴻去。信盼雙魚還。秋雪龍沙夜。憐君憶妾顏。庾度支肩吾侍宴

芳苑帷宮啓。華林帳殿開。珠旗柳外見。玉輦花間來。新豐隣鄠杜。太液接蓬萊。月駟並鑣列。風鳥平翅迴。桐乳潤宿露。草帶長春茝。萬方賜酺宴。羣工分袂盃。曼衍魚龍戲。班聯鸛鷺陪。東京繼文藻。西園思上才。陽春頌明德。終是遜鄒枚。

何水曹遜示哀

平楚層陰合。長林晚烟聚。空江澹微波。落日隱遙樹。初月起秋旻。殘星下巖霧。斷峽猿競啼。澄潭鴈飛度。境曠絕諸妄。神清瑩百慮。漂搖古原上。疲馬識征路。雲嵐思故山。撫景時一遇。眷此壯士懷。慨焉悵遲暮。長辭石渠彥。采采木蘭露。

蕭東陽子雲望春

修陰夾槐里。香風生蘅皋。登高遠目縱。流盼春情翔。文鶯選綠樹。綺燕嬌紅桃。遊女朱輪馳。公子華纓飄。采藍中谷近。拾翠迴塘遙。寶馬嘶桂勒。畫輪引蘭橈。病臥懷藍田。眷念中心切。

虞長侍義北伐

嫖姚度絕幕。車騎出長城。長城萬餘里。落日烟塵生。暗風塞馬嘶。驚沙隴鴈鳴。玉帳起寒色。金笳沉夜聲。壯士空同劍。漢將天山旌。偃月築堅壁。長星貫敵營。闕支泣紅粉。當戶紩元纓。龍沙淨埽穴。狼望快犁庭。瀚海舊垂績。燕然新勒銘。金人朝漢闕。玉馬獻周京。靈臺方偃伯。武庫長銷兵。功成報天子。偉烈邁千齡。

吳朝請均春怨

珠簾朝日升。羅幌微風扇。金枕閒空牀。銅鋪鏤深院。綺樹初留鶯。雕欄又來燕。衣薄寒瑤瑤。袖長觸寶釧。檐柳冒紫釵。鏡花消翠鈿。曉妝愁不成。午坐繡初倦。行藥遲中庭。看花怯遙甸。芳期度寂寞。春閨等秋殿。征人萬里餘。相思那能見。欲寄隴頭書。歸程託春鴈。

徐內史俳酬友

長河迴一曲。太華削三峯。雙龍樹華闕。五鳳建會宮。宜溫煥列宿。嶢嶢驗別風。仙波流太液。靈草植唐中。金爵觚稜上。銅盤沆瀣濃。飛甍接陽馬。複道亘雄虹。綺陌褰斜帶。金溝灞漭通。少年三輔俊。結客五陵雄。長執侍郎戟。能挽壯士弓。恥邀劇孟侶。思建嫫媿功。歸來畫麟閣。劍佩自雍容。

劉祕書孝綽 歸沐

暫容辭禁籞。休暇美遨遊。徘徊望省闕。宮觀鬱然稠。周廬滿上闕。馳道暗長楸。金甍麗華闕。朱恩隱層樓。鵷鷺翼宣室。蓬萊濫瀛洲。玉泉上文鯉。珠樹鳴春鳩。嗟予巖壑姿。羈宦心煩憂。雕龍非爽侶。吐鳳豈雄儔。世網懼見撓。初服何能酬。灞水引蘭櫓。杜陵鳴華輶。絃桐奏落日。簫鼓遲中流。未遑謝軒冕。聊以慰三秋。

劉庶子孝標 詠月

絡角長河掩。高城清漏殘。濃陰轉綠桂。微露霽紅蘭。輝分圓鏡滿。影入高樓寒。涼暈蕩珠箔。明輝流玉關。極浦雁初下。長征人未還。鄉書盼不到。寒衣寄亦難。中庭怨砧杵。孤枕夢刀鐏。龍城三五夜。應復倚弓看。

庚開府信 詠懷

橘柚南中樹。胭脂北地花。羈心悲去國。旅夢易還家。玉塞空春色。金陵幾歲華。江山懷鳳闕。風雨暗龍沙。寒聲驚朔雁。客情愁暮鴉。惟餘王粲恨。極目此天涯。

陳後主叔寶 稷飲

佳節啓宸苑。芳春遊近畿。瓊樹隱琴蓋。瑤林出畫旂。金溝綠水漲。玉殿青檣移。鴛浮羽自捷。波激珠連揮。

桂月掩歌扇。蘭雲裁舞衣。簪纓美華飾。紈綺生光輝。花花各異色。燕燕自交飛。懽洽盛文藻。既醉莫言歸。

徐僕射陵 春情

暄同薄寒減。晝長春困降。草長蘼蕪村。水落芙蓉江。蛺蝶上玫瑰。蜻蜓窺畫牕。池鏡落花照。風簾來燕雙。香痕冷金鴨。燈穩消銀缸。寥芳惜日暮。何處採春汪。

沈侍中炯 自傷

蘇武悲殊域。崔駰憶舊鄉。中原異疇昔。行子意摧傷。狼望花疑雪。龍堆月似霜。金輿怨蕭瑟。玉殿動淒愴。鶯花廢苑舊。燕麥故宮荒。井邑空遺迹。河山弔夕陽。通天臺下客。祇自怨興亡。

陰常侍鏗 送別

風花迎去舳。烟水盪迴橈。遠浦歇朝雨。空江生晚潮。烟迷揚子渡。雲暗石城橋。別意滿芳樹。離情繫柳條。遊子悵行邁。羈人惜路遙。乍幸萍水合。各惜飛蓬飄。金尊薦華袖。銀箏怨綠腰。行旌隨去雁。極目駐蘭鑣。

張散騎正見 汎舟

芳渚乘新漲。流波蕩畫紋。蘭橈全倚水。桂棹半圖雲。花氣風隨合。秋陰雁共分。仙靈疑泝洛。鱗鱗憶橫汾。菱謳遙渚動。蓮唱別舟聞。翠被焚香夜。還應羨鄂君。

江僕射總 羈思

寒霜晨雁急。衰柳夜烏啼。故國悲烟雨。家山泣鼓鼙。玉樹花枝斷。蒼梧雲影低。春江潮寂寂。秋閣草萋萋。

紅綃遺舊製。璧月失前題。吳語幾能慣。越吟空自悽。金陵王氣盡。還復弔青溪。

魏特進收喜雨

油雲暗遙嶺。微風轉前庭。山中石燕舞。屋角斑鳩鳴。碧滋苑樹重。紅潤檐花輕。午陰消翠幙。夕涼生畫屏。簾櫳密絲織。池沼圓波生。聊將雲漢意。稍酬望歲情。

盧武陽思道贈別

博望河源遠。長卿蜀道難。何如秉漢節。西去鎮秦關。金尊別酒盡。玉篴驪歌殘。飛雨雁邊下。橫雲馬上看。明星華嶽樹。曉月黃河灣。冰開素滻動。雪霽藍田寒。茂林花宅發。灞岸柳堪攀。舊里沒文礎。荒池起廢蘭。非尋金馬去。詎訪碧雞還。會邀明主賜。珪璧琢明玕。

李內史德林銷夏

虛堂初下露。水榭自生煙。疏牕薄帷動。密樹繁陰圓。流黃珍簾滑。疊雪香羅妍。扇中秦女鳳。枝上魏宮蟬。寒綠自沉李。輕紅初上蓮。及此陶嘉日。林塘晞髮眠。

隋煬帝廣寒宴

狼河烟不動。龍堆花自春。仙雲玉帳繞。麗日朱旗殷。單于祝曼壽。闕支稱至親。天山空事漢。長城應過秦。從今絕域外。不復祭金人。

楊楚公素山齋

素襟避塵器。棲山事卜築。紅泉澄空潭。翠礪潛深谷。碧鳳馴疏桐。蒼籟響修竹。風來藥苗香。日下松陰綠。聊用適性情。非爲耽幽獨。抱琴遲素心。江湖遠高躅。

薛司隸道衡 酬憶

別緒雲霄路。羈懷江海人。嗟予猶滯洛。念子獨遊秦。秦關卽長道。望遠心如擣。花紅芳甸暄。波綠春江曉。曉夢託相思。悠悠不可期。碧落金神掌。明星玉女祠。祠前雲樹斷。采藍嗟不見。日暮憶王孫。空梁有來燕。

詠美人六首

美人如明月。三五光徘徊。露下玉階濕。風颺羅幃開。麗華桂枝曲。嫦娥明鏡臺。珍重慰寂寞。流照上青苔。美人如碧雲。縹緲雲中君。絳河麗妙鬢。碧落敷華雲。卷衣誤秦女。迴風疑洛神。日暮盼不極。一片陽臺春。美人如名花。可翫不可褻。穠芳豔春霞。幽姿澹秋雪。綽約束腰素。玲瓏生眼纈。懷袖拂留英。三年香不滅。美人如香草。相得愛同心。臨疏擷芳杜。人遠滿湘深。忘憂夙所懷。合歡匪自今。古調響空谷。哀絃彈青琴。美人如異書。古豔無由俗。相對一樽酒。夜靜焚香讀。塵心澹欲無。勞生願亦足。努力愛華年。無事此爲福。美人如青山。相依欲終老。秀色雙蛾眉。中隱此中好。銅疾深烟霞。凡心謝蓬島。瞻茲一心人。玉顏頗長保。

江南樂

江南樂。楊柳桃花滿城郭。臨水家家開畫閣。碧紗虛牕繡羅幕。玉鈎半挂真珠箔。如花女兒花灼灼。眉影彎環腰成削。春衫稱身身綽約。玻璃酒船門外泊。鸚鵡之殘鸚鵡杓。紅梁碧醴隨意酌。玉簫金管兩頭作。

國手無雙弄絃索。丁丁細聲私語託。晚霞銜山白日落。明燈照臉紅暈薄。鴛鴦無聲春漠漠。人生無如江南樂。

花蕊夫人詞

摩訶池上蘭橈起。雪香扇底秋如水。太平天子最風流。不愛花枝愛花蕊。翠鈿蕭條葬太華。後宮領袖屬徐家。冰肌玉骨清無汗。國色爭推解語花。香囊四角流蘇帳。幃宮彷彿前朝樣。恩重鴛鴦第一人。春風不羨羣花放。親奉蟠桃酒一杯。涼生水殿暗香來。宮詞百首追王建。絕代芳華絕世才。紅梔子綻真珠面。翠恩六鶴圍銅沓。錦地橫鋪白玉階。牙牀深鎖黃金閣。九曲龍池卅六宮。五雲高閣坐當中。錦官城郭芙蓉色。不及朝霞一鏡紅。百花潭水春波冶。芳晨從駕紛紛都雅。映水龍舟島嶼中。隔花風釐樓臺下。豈知轉眼陣雲黃。高髻朝天兆急粧。燕子砦前無戰壘。龍神祠外失浮梁。四十萬人齊解甲。可憐馬上宮腰怯。故宮望斷不歸來。一樣傷心悲建業。慷慨猶傳應詔詩。蛾眉原不媿男兒。流傳謠語何人筆。半闕葭萌驛壁詞。故君恩重留殘畫。宜男每下張仙拜。燭影搖紅慣負心。青溪劍血尤無賴。別有嬋娟未受恩。巖巖劍閣肯捐身。黃金欲買西川錦。織出當年殉國人。蜀宮人哀盛。花蕊夫人侍兒也。國亡。夫人入宋。不肯從。過劍閣。自投崖下死。其壘處石上。點點作珊瑚斑。卽靈骨所托也。見薛嵩山香集。

春閨怨四言詩

金微路遠。藁砧不歸。啼鴛破夢。落花自飛。空階無人。迴風吹衣。

翽風怨

妾初奉君宴。嬌若芙蓉花。細骨復輕軀。縹緲凌飛霞。碧纔輕試風。香塵不啻鴉。珍珠賜百琲。舞袖生光華。妾齒日以長。君情日以疏。秋風冷後房。明月窺前除。脫我金縷衣。疊我香羅襦。聞君交州回。新得美顏姝。別起三成樓。朝日耀金鋪。置之同心帳。香囊下流蘇。贈之百寶釵。珊瑚問明珠。玉壺薦芳醴。金盤膾鯉魚。新人年幾何。十五頗有餘。玉顏願長保。君恩終不渝。

摩多樓子

長征十萬人。遠行八千里。秦山復楚山。隴水更湟水。山高水復深。日暮愁人心。西望風塵色。東流嗚咽聲。道遠夢難越。邊風與邊月。邊月照刀環。邊風吹馬骨。

達摩支曲

素手繰絲絲不絕。寶刀斷流流更急。今人心豈古人意。昨日花非前日色。君不見秦皇虎視何雄哉。美人置酒臨高臺。地下已看牧兒入。海上不見童男回。又不見漢武求仙乏仙骨。甲帳珠簾冷秋月。茂陵松柏摧爲薪。王母桃花又成核。

詠鏡

明鏡如明月。朝朝照面寒。曾將兩人影。同向此中看。自別秦臺鳳。常閒珠樹鸞。菱花莫輕拭。雙淚落洊瀾。雲彈孃詞